

Witanske słowa Hajka Kozela, serbskeho zapóslanca LĚWICY Sakskeho krajneho sejma na 19. hłownej zhromadźiznje Domowiny, dnja 30.03.2019 w Chróścicach

Lubi bratřa, lubi sotry,

naša džensniša hłowna zhromadźizna běše za mnje nastork jónu do mojeho stareho čłonskeho wupokaza pohladać a zwěšćach zo sym w tutym lěće 40 lět čłon Domowiny. Formalne přiwazaće wotměwaše so na jednym kubłanišću, t.r. – na Hućinjanskej B-šuli. Potajkim steješe kubłanje na spočatku mojeho čłonstwa w Domowinje.

W zašłych štyrceći lětach běše kubłanje dosć palacy tema w Serbach, za Domowinu a tež za mnje wosobinsce kaž tež powołansce. Wot časa přewróta sem smy přehusto byli w situacijach hdžež njemóžachmy docpěty staw serbskeho kubłanskeho systema polěpšić a wutwarić ale hdžež dyrbjachmy wohroženja wotwobarać. Myslu tu jenož na zawrjenje serbskich srjedźnych šulow – wosebje na Chróšćan zběžk abo aktualnje na problem pobrachowacych serbskich wučerjow. W srjedžišću steji nětko nadawk wšitkim šulerjam a šulerkam poskićić tajke kubłanske wuměnjenja, kotrež jim na zakładze docpěteho rěčneho stawa trěbne wuměnjenja za docpěće maksimalneje rěčneje kompetency skića. Wobmyslenja nanow a maćerjow maćernorěčnych džěci wo aktualnych wuknjenskich wuměnjenjach dyrbymy chutne brać. Hdyž zarjad Domowiny nětko “kubłansku klawsuru” k rozrisanju tutoho problema organizuja, potom to jako Domowinjan z 40-lětnym čłonstwom witam a hdyž Serbski Sejm w samsnej tematicke zjawny “kubłanski wjeršk” wuhotuje, potom to jako zapóslanc Serbskeho Sejma witam.

Sam sym so wuspěšnje wo to prócował, zo je Sakska frakcija LĚWICY po zjawnej diskusiji na 14. Serbskim dnju frakcijow LĚWICY Sakskeje a Braniborskeje, dnja 09. nowembra 2018 w Budyšinje, do naćiska noweje Serbskeho zakonja wosebity paragraf přiwzała, kotryž so wuraznje bytostnym problemam serbskeho kubłanja wěnuje. Serbske kubłanje je w tajkej chutnej situaciji, zo by dyrbjala nam kóžda myslička wažna a witana być. Trjebamy respekt a jednotu mjez wšitkimi akterami a multiplikatorami, kotrež so wo polěpšenje situacije zasadza. Tohodla so na tutym městnje wšěm čestnohamtsce skutkowacym za jich dotalnu prócu a njesebične zasadženje wo byće a traće Serbstwa džakuju.

Zhromadnje dyrbimy so tež wěnować aktualnym wužadanjem strukturneje změny we Łužicy. Dyrbimy pola němskich partnerow sensibelność budzić za trěbność narunanja rěčnych a kulturnych stratow, kotrež su serbskemu ludej přez wudobywanje brunicy nastali. Wažne w tutym zwisku – natwar nowych rěčnych rumow. A tež tu trjebamy engažement a intelektuelny potencial wšitkich Serbowkow a Serbow.

Ja sej přeju, zo by džensniša 19. hłowna zhromadźizna Domowiny k tomu přinošowała. Tute přeće njewupraju jenož jako Serb, Domowinjan a serbski zapóslanc Sakskeho krajneho sejma ale tež jako nan hólca, kotryž póndže w tutym lěće do šule.

Lubi delegatki, lubi delegaća,

w tutym zmysle přeju Wam wuspěšne wuradźowanje, kreatiwne mysle a produktiwne wobzamknjenja na dobro našeho luda.

Hajko Kozel

(Witanske słowa na 19. hłownej zhromadźiznje Domowiny, dnja 30.03.2019 w Chróścicach) -płaćiwe je rěčane słowo-